



Inatsisartunut ilaasortamut  
Aqqalu C. Jeremiassen  
Atassut

31-05-2023  
Suliap normua 2023 - 13695  
All. 23015091

Postboks 260  
3900 Nuuk  
Tlf. (+299) 34 50 00  
Fax (+299) 34 66 66  
E-mail: iian@nanoq.gl  
www.naalakkersuisut.gl

**Ulloq unnuarlu paaqqinnittarfinnut tunngatillugu § 37 naapertorlugu apeqquteqaammut nr. 093-2023-mut akissuteqaat**

Asasara Aqqalu C. Jeremiassen.

Apeqqutinut qujanaq. Apeqqutit ataasiakkaarlugit akissutinik malitseqartillugit ataani allaqqinneqarput.

**1. Meeqqat atorfeqartullu immikkut wc-qarnissaannut piumasaqaat piviusorsioortumik aamma imminut pigisunut ulloq unnuarlu paaqqinnittarfinnut atuutsinneqarpa?**

Aap.

**2. Meeqqat tamarmik immikkut sinittarfeqarnissaannut piumasaqaat piviusorsioortumik aamma imminut pigisunut ulloq unnuarlu paaqqinnittarfinnut atuutsinneqarpa?**

Aap.

**3. Imminut pigisut ulloq unnuarlu paaqqinnittarfippassuit inissianik attartortariaqartarmata, immikkut wc-qartoqarnissaa immikkullu sinittarfeqartoqarnissaa pillugu piumasaqartoqarnissaanut Naalakkersuisut naleqquttuusorivaat?**

Aap.

**4. Imminut pigisut ulloq unnuarlu paaqqinnittarfiit aningaasatigut sinneqartoruuteqarsinnaanngimmata, inissianik sanaartornissamut allanngortiterinissamullu aningaasanik immikkoortiterisannginnissaat Naalakkersuisut naleqquttuusorivaat?**

Ulloq unnuarlu paaqqinnittarfimmik akuersinermi aserfallatsaaliuinermit pilersaarummik akissanut missingersuutitalimmik tunniussinissaq ilaatigut piumasaqaataavoq.



**5. Ulloq unnuarlu paaqqinnittarfinnut isumasioqatigiissitsinerni saqqummiunneqartunut misilittagarpassuarnik pitsanngorsaaniissamullu kissaateqarnernik Naalakkersuisut kingusinnerusukkut akuersillutillu atorluaappat?**

Ulloq unnuarlu paaqqinnittarfimmik ingerlatsinissamut perorsaanikkut sulianik ilisimasaqarnek kiisalu sammisat attuumassutillit allat isumasioqatigiissitsinerni qitiutinneqarsimapput, soorlu: Eqqarsartaatsinik paasinninnerit, pissaanermik atuineq, kinguaassiutitigut atornerluinermik pinaveersaartitsineq suleriutsillu. Ulloq unnuarlu paaqqinnittarfiit assigiinngitsut akornanni suleqatigiilluarnerneq anguniarlugu isumasioqatigiinnermi 2022-mi attaveqatigiittartunik ilaatigut pilersitsisoqarsimavoq aamma PI/SPS-ip suleqatigineratigut ulloq unnuarlu paaqqinnittarfinni sulisut ilinniarsimanngitsut modulikkaarlugit pikkorissarfissaat ineriartortinneqarsimapput.

**a. Taamaattoqarpas, kissaatit suut piviusunngortinneqarpas?**

Apeqqut 3-mut akissut innersuussutigineqarpoq.

**6. Ulloq unnuarlu paaqqinnittarfiit akuersissutigineqaqqinnissaat 2017-imi atulersinneqarneraniit, imminut pigisut ulloq unnuarlu paaqqinnittarfiit qassit akuerineqarpas?**

Ulloq unnuarlu paaqqinnittarfiit imminut pigisut pioreersut arfineq-pingasut tamaasa kiisalu ulloq unnuarlu paaqqinnittarfiit nutaat marluk akuerineqarput. Ulloq unnuarlu paaqqinnittarfiit katillugit qulit akuersissutiminnut piumasaqaatinik tunineqarsimapput, maannalu taakku malitseqartitsineqaleruttorput.

**7. 31. august 2021-meersoq Namminersorlutik Oqartussat nalunaarutaanni nr. 50-imi allaaserineqarsimanngitsunut imminut pigisunut ulloq unnuarlu paaqqinnittarfinnut sulianik sullissisartut allanik piumasaqaatinillu nutaanik ilanngussinissaannut inatsisitigut tunngavissaqarpas?**

Meeqqanut ulloq unnuarlu paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaanni §§33-43-mi ulloq unnuarlu paaqqinnittarfik imminut pigisoq Isumaginninnermut Aqutsisoqarfimmit akuerineqartinnagu piumasaqaatinik naammassineqartussanik amerlasuunik imaqarpoq. Tamatuma saniatigut sulianik sullissisut ulloq unnuarlu paaqqinnittarfimmut piumasaqaateqarsinnaanngillat, piumasaqaatilli tamaasa erseqqissarneqaqqissaanngillat. Taamaattumik Namminersorlutik Oqartussat nalunaarutaat malillugu ulloq unnuarlu paaqqinnittarfiit ataasiakkaat piumasaqaatinik naammassinninnerannik sullissisoq tamakkiisumik nalilersuissaaq.

**8. Inatsit naleqqunneruniassammat ullullu tamaasa meeraq qitiutillugu suleqatigisartagaanniit misilittagaareersunit tunngaveqarneruniassammat ulloq unnuarlu paaqqinnittarfiit pillugit Naalakkersuisut inatsimmik allannguisinnaappat naleqqussaasinnaallutillu?**

Ullutsinni inuiaqatigiinnut naapertuunnissaat sapinngisamik pitsaanerpaatinniarlugit inatsisit, matumani nalunaarutit, ingerlaavartumik naleqqussarneqartarput. Aammattaaq Meeqqanut ulloq unnuarlu paaqqinniffinnik pilersitsineq ingerlatsinerlu pillugit Namminersorlutik Oqartussat nalunaarutaat pisariaqavissumik annertussusilimmik nutarterneqassaaq, soorunami suleqataasut attuumassutillit peqataatillugit.



**9. Ingerlatsinermi toqqaannartumik kiisalu toqqaannangitsumik aningaasartuuteqarnerit ilanngukkaanni sorleq aningaasartuuteqarnerua? Imminut pigisut ulloq unnuarlu paaqqinnittarfiit imaluunniit Namminersorlutik Oqartussat ataani ulloq unnuarlu paaqqinnittarfiit? Allaffissornikkut aningaasartuutit kiisalu nutarterinermi, pissarsiniarnermi angalanermilu aningaasartuutit ilanngullugit.**

Ulloq unnuarlu paaqqinnittarfiit naatsorsueqqissaarnermut nalunaarusiaanni allaffissornermi aningaasartuutit, nutarterinermi aningaasartuutit, angalanermi aningaasartuutit pissarsiniarnermilu aningaasartuutit immikkut ittumik allaqqangimmata, Isumaginninnermut Aqutsisoqarfik sanilliussisinnaangilaq. Taamaammat Isumaginninnermut Aqutsisoqarfik ulloq unnuarlu paaqqinnittarfiit imminut pigisut naatsorsuutaannut isersinnaangimmat, apeqqut akineqarsinnaangilaq.

Inussiarnersumik inuulluaqqusillunga

Mimi Karlsen